

Հ. Կարապետյան

1920 թ. ՄԱՅԻՍՅԱՆ ԱՊՍՏԱՄԲՈՒԹՅՈՒՆԸ

Հայաստանի բանվորների, աշխատավոր գյուղացիների և զինվորների 1920 թվականի մայիսյան զինված ապստամբությունը հայ ժողովրդի ազատագրական պայքարի դարավոր պատմության մեջ առանձնահատուկ տեղ է գրավում և հանդիսանում է այդ պատմության փառավոր էջերից մեկը:

Մայիսյան ապստամբությունը Բաքվի փառապանծ Կոմունայից հետո, Սովետական իշխանության հաղթանակի համար 1918—1920 թթ. Անդրկովկասի աշխատավորների մղած պայքարի խոշոր դրվագներից է: Այդ հերոսական ապստամբությունը, որը զլխավորում էին Հայաստանի կոմունիստական կազմակերպությունները, աշխատավորների համաժողովրդական զինված պայքար էր, որի նպատակն էր վերջ տալ դաշնակների մարիոնետային, հակաժողովրդական անիծյալ տիրապետությանը, երկրից վռնդել անգլո-ամերիկյան լիսի գաղութարարներին և Հայաստանում հաստատել սովետական կարգեր:

Մայիսյան ապստամբությունը հանդիսացավ այն պայքարի շարունակությունը, որ Հայաստանի բանվորները, գյուղացիները և զինվորները, Անդրկովկասի բոլոր աշխատավորների հետ միասին, բոլշևիկների ղեկավարությամբ, մղում էին՝ Հոկտեմբերյան սոցիալիստական Մեծ ռեոլյուցիայի հաղթանակը Անդրկովկասում ապահովելու համար:

I

Հոկտեմբերյան սոցիալիստական Մեծ ռեոլյուցիան ժողովուրդների պատմության մեջ նոր էպոխայի սկիզբ հանդիսացավ, նրանով սկսվեց «...համաշխարհային պատմության նոր գլուխը՝ պրոլետարական դիկտատուրայի դարաշրջանը»¹:

Ռուսաստանի բոլոր ժողովուրդների, առանձնապես բազմաշարժար հայ ժողովրդի ազատագրումը կեղեքումից ու ստրկությունից՝ սերտ կերպով կապվեց Հոկտեմբերյան սոցիալիստական Մեծ ռեոլյուցիայի ճակատագրի հետ:

Հայաստանի աշխատավորները Հոկտեմբերյան ռեոլյուցիայի լուրն ընդունեցին մեծ խանդավառությամբ և ջերմորեն ողջունեցին նրա հաղթանակը: Նրանց համար պարզ դարձավ, որ «Իիվանագիտական կոմբինացիաների հին ուղին Հայաստանի ազատագրության ուղին չէ», որ ինչպես բոլոր ճնշված ժողովուրդների, այնպես էլ հայ ժողովրդի ազատագրության իսկական ուղին

¹ Վ. Ի. Լենին, Երկեր, հատ. 33, էջ 116:

բուլշևիկների ցույց տված ուղին է, այն ուղին, որը «...անցնում է Ռուսաստանում հոկտեմբերին սկսված բանվորական ռևոլյուցիայի միջով»¹։

Հայաստանի կոմունիստական կազմակերպությունները ՌԿՊ ձրկրային Կոմիտեի ղեկավարությամբ, ինչպես մինչև Հոկտեմբերյան ռևոլյուցիան, այնպես էլ նրանից անմիջապես հետո, քաղաքական, մասսայական մեծ աշխատանք կատարեցին։ Նրանք կազմակերպեցին մասսաներին՝ ընդդեմ սոցիալիստական ռևոլյուցիայի թշնամիների՝ շահագործողների կամուկատար դաշնակների, մենշևիկների, էսենների և մյուսների, որոնք ամեն կերպ ձգտում էին ժողովրդական մասսաներին հեռու պահել պրոլետարիատի դիկտատուրայի համար մղվող ռևոլյուցիոն պայքարից։

Հայաստանի քաղաքներում և գյուղական վայրերում՝ Ալեքսանդրոպոլում, Սարիղամիշում, Կարսում, Նրևանում, Ջալալ-օղլիում (Ստեփանավան), Հադսպատում և այլ վայրերում, բանվորները, գյուղացիները և զինվորները՝ ողջունելով Հոկտեմբերյան ռևոլյուցիայի հաղթանակը, իրենց համերաշխությունն էին հայտնում Պետրոգրադի պրոլետարիատին ու զինվորներին, հայտարարելով, որ Հայաստանում ևս իշխանությունը պետք է անցնի Սովետներին և պայքարում էին այդ նպատակի համար։

Սարսափած Անդրկովկասում Սովետական իշխանություն հաստատման փաստից, ռեակցիոն ուժերը, ցարական գեներալների և օտարերկրյա իմպերիալիստների ներկայացուցիչների ակտիվ աջակցությամբ, ստեղծեցին հակասովետական կոալիցիա, միասնական ճակատ կազմեցին, որպեսզի ճնշեն աշխատավորների ռևոլյուցիոն շարժումը, կանխեն սոցիալիստական ռևոլյուցիայի հաղթանակը Անդրկովկասում։ Այդ հակասովետական բլոկը՝ բաղկացած մենշևիկներից, դաշնակներից և մուսավաթիստներից, աշխատավորների կամքին հակառակ, 1917 թ. նոյեմբերի 15 (28)-ին կազմեց կոնտրռևոլյուցիոն «կառավարություն», այսպես կոչված, Անդրկովկասյան Կոմիսարիատը որոշեց շճանաչել Սովետների համառուսական երկրորդ համագումարի կողմից ընտրված օրինական կառավարությունը երկրում՝ ԺԿՍ-ի իշխանությունը։

Կոնտրռևոլյուցիոն «կառավարությունը» սկսեց վարել Անդրկովկասը Սովետական Ռուսաստանից անջատելու քաղաքականություն, որը խիստ դիմադրության էր հանդիպում ամբողջ երկրամասի աշխատավորության կողմից։ Ինչպես Անդրկովկասի մյուս վայրերում, այնպես էլ Հայաստանում՝ Ալեքսանդրոպոլում, Կարսում, Սարիղամիշում և այլ վայրերում տեղի էին ունենում միտինգներ և ժողովներ՝ ընդդեմ կոալիցիոն Կոմիսարիատի։ Աշխատավորները պահանջում էին ցրել ինքնակոչ Կոմիսարիատը, իշխանությունը հանձնել Սովետներին, ճանաչել ԺԿՍ-ի իշխանությունը Լենինի ղլխավորությամբ։

Սովետական իշխանության համար մղվող պայքարը 1918 թ. մարտի վերջերից թևակոխում է իր նոր փուլը, երբ քաղաքացիական կռիվի մարտերում՝ Բաքվում իշխանությունը ամբողջովին անցնում է Սովետի ձեռքը։ Բաքվի Սովետական իշխանության գոյությունը ողբնշում էր երկրամասի աշխատավորներին։ Անդրկովկասի կոնտրռևոլյուցիոն կոալիցիան, իշխանությունը իր ձեռքում պահելու նպատակով՝ դիմում է օտարերկրյա ինտերվենտների օգնու-

¹ Ի. Վ. Առալին, Երկեր, հատ. 4, էջ 30—31։

թյանը: Նա Անդրկովկասը նախ հանձնում է գերմանա-թյուրքական զավթիչների հոշոտմանը, ապա անգլո-ամերիկյան գաղութարարների կեղեքմանը: Երկիրը դարձնում է ռուսա-ստրատեգիական բազա Սովետական Ռուսաստանի դեմ պայքարելու համար:

Անդրկովկասի աշխատավորության այդ նողկալի թշնամիները՝ կատարելով ունևոր դասակարգերի և ինտերվենտների ցանկությունները՝ 1918 թ. ապրիլի 22-ին Անդրկովկասը հայտարարում են անջատված Սովետական Ռուսաստանից: Կոնտրոնոլյուցիոնների այդ քայլը մեծադույն վայրույթ առաջ բերեց ժողովրդական լայն խավերի մեջ, որոնք պահանջում էին հանրաքվե անցկացնելու: Անդրկովկասի, այդ թվում Հայաստանի բանվորներն ու գյուղացիները դիտակցում էին, որ իրենց փրկությունը միայն Ռուսաստանի հետ լինելու մեջ է, որ ներքին և արտաքին կեղեքումից նրանց կարող է փրկել միայն Սովետական իշխանությունը:

Անդրկովկասի աշխատավորների ռևոլյուցիոն միասնությունը ջլատելու, Սովետական իշխանությունը Բաքվում և նրա մերձակա շրջաններում խեղդելու նպատակով՝ հակասովետական կոալիցիան մասնատեց Անդրկովկասը: 1918 թ. մայիսի 26-ին Սեյմը դիմեց ինքնալիկվիդացման: Նույն օրը Վրաստանը հայտարարվեց «անկախ» ռեսպուբլիկա: Վրաց մենշևիկներին հետևեցին մուսավաթիստները և դաշնականները, ստեղծելով մարիոնետային առանձին ազգային ռեսպուբլիկաներ:

II

Հայ ժողովրդի արգահատելի թշնամիները՝ դաշնականները, Հայաստանի աշխատավորների կամքից անկախ, 1918 թ. մայիսի 28-ին Հայաստանը հայտարարեցին «անկախ» և հաստատեցին իմպերիալիստներից ամբողջովին կախված իրենց արյունոտ տիրապետությունը:

Դաշնականների տիրապետության տարիներին Հայաստանում թագավորում էր անգլո-ամերիկյան գաղութարարների կամքը: Հայաստանի «կառավարողները» խաղալիք էին իրենց տերերի ձեռքին, հանդիսանում էին նրանց թելադրանքների կատարողները:

Դաշնականները ոչ մի ջանք չէին խնայում, որպեսզի պարտության մատնեն Բաքվի Սովետական իշխանությունը, որը հանդիսանում էր ամբողջ Անդրկովկասի աշխատավորների ռևոլյուցիոն պայքարի ուղեցույցը, միջնաբերդը: Նրանք որոշեցին թյուրքական ինտերվենտների սրամադրության տակ դնել Հայաստանի տերիտորիան և երկաթուղին՝ Բաքվի Սովետական իշխանության դեմ զորք և ռազմամթերք տեղափոխելու համար:

Բաքվի հայոց ազգային խորհուրդը՝ դաշնականների գլխավորությամբ, քայքայիչ աշխատանք էր կատարում թիկունքում, գերմանա-թյուրքական ինտերվենտների և մուսավաթական բանդանների դեմ մղվող վճռական պայքարի ժամանակ: Նա գաղտնի կապեր էր հաստատում անգլիական իմպերիալիստների հետ, իր ներկայացուցիչների միջոցով բանակցություններ էր վարում Պարսկաստանում (Էնվելի) գտնվող անգլիական զորքերի հրամանատար գեներալ Դևիստերվիլի հետ՝ Բաքուն անգլիացիներին հանձնելու համար և դրանով էլ նպաստեցին անգլիացիների մուտքին՝ Բաքու:

Անգլիական իմպերիալիստները եկան Բաքու նավթին տիրելու, Սո-

վետական իշխանությունը տապալելու համար: Նրանք Անդրկովկասի ժողովուրդների նկատմամբ վարում էին բնաջնջման, ստրկացման քաղաքականություն: Չնայած դրան՝ դաշնակները, Հայաստանի աշխատավորների այդ դահիճները, երկիրը հանձնեցին անդլո-ամերիկյան ինտերվենտներին, այն ծառայեցնելով ռազմա-ստրատեգիական բազա՝ ընդդեմ Սովետական Ռուսաստանի: Անգլո-ամերիկյան իմպերիալիստներին չէր հետաքրքրում հայ ժողովրդի ծանր դրությունը, նրանք ցանկանում էին հայ աշխատավորներին օգտագործել որպես «սքանչելի ռազմական նյութ», ինչպես գրում է գեներալ Դինստիրվիլը:

Դաշնակցական կառավարությունը ակտիվ համագործակցության մեջ էր գտնվում Դենիկինի և մյուս սպիտակ գվարդիական գեներալների հետ, օգնում էր նրանց՝ Սովետական իշխանության դեմ կռվելու համար: 1919 թ. Ա. Ի. Միկոյանը գրել է, որ դաշնակցական կառավարությունը վայելում է Անտանտայի իմպերիալիստների և Դենիկինի համակրանքը, աջակցությունը և բոլոր միջոցներով պաշտպանում է նրանց, «իսկ Դենիկինի հետ ռազմական հաղտնի դաշինքի մեջ է»¹:

Դենիկինը Հայաստանը համարում էր իրեն ենթակա տերիտորիայի մի մասը, իսկ դաշնակների բանակը՝ իր բանակի միավորներից մեկը:

Դաշնակցական կառավարությունը իր գոյության տարիներին միշտ վարում էր ակտիվ և սանձարձակ հակասովետական քաղաքականություն:

Հայաստանը դաշնակների տիրապետության օրոք ազգամիջյան ջարդերի ու կոռիվների թատերաբեմ էր: Դաշնակա-մաուզերիստական հրոսակախմբերը թալանում, սպանում էին ազգային փոքրամասնություններին: Նրանք ավերակ դարձրին բազմաթիվ ադրբեջանական գյուղեր և բնակավայրեր՝ Նոր Բայազետի, Բասարգեչարի, Զանգիբասարի, Աղբաբայի և մյուս շրջաններում: Նույն մեթոդով էին գործում հայերի դեմ մուսավաթիստները՝ Ադրբեջանում, մենշևիկները՝ Վրաստանում:

Ժողովրդական տնտեսության քայքայումը Հայաստանում հսկայական չափեր էր ընդունել: Կատարյալ փլուզման էր հասել առանց այն էլ թույլ դարգացած և համաշխարհային իմպերիալիստական պատերազմի տարիներին քայքայված արդյունաբերությունը: 1919 թվականին արդյունաբերության համախառն արտադրանքը 1913 թվականի համեմատությամբ պակասել էր ավելի քան 12 անգամ: Սուր ճգնաժամ էր ապրում երկրի տնտեսության հիմնական բնագավառը՝ գյուղատնտեսությունը իր բոլոր ճյուղերով: 1913 թվականի համեմատությամբ հացահատիկային կուլտուրաների տարածությունը 1919 թվականին պակասել էր շորս անգամ, իսկ ամբողջ գյուղատնտեսության համախառն արտադրանքը՝ մոտ վեց անգամ:

Դաշնակների կառավարությունը չէր ցանկանում լուծել հողային հարցը: Ավելին, նրա քաղաքականությունը գյուղում՝ նպաստում էր գյուղի մանր տնտեսությունների հողազրկման պրոցեսի արագացմանը, չքավոր տնտեսությունների յայքայմանը և լուսնոր-կուլակային վերնախավի ուժեղացմանը: Չքավոր և միջակ տնտեսատեր գյուղացիների հողը, դորժիքները, անասունը և այլն կենտրոնանում էր կուլակային և վաշխառուական տարրերի ձեռքում:

Աշխատավոր գյուղացիների բոլոր փորձերը՝ կալվածատերերից և կուլակ-

¹ С. М. Киров, Статьи, речи, документы, стр. 143.

ներից հողը խլելու ուղղությամբ, հանդիպում էին դաշնակցական կառավարության ակտիվ դիմադրությանը, զենքի ուժով հողը վերադարձվում էր խոշոր հողատերերին: Չնայած դրան՝ հողագուրկ և սակավահող գյուղացիները շարունակում էին պայքարը կալվածատիրական հողերը խլելու համար: Ահա թե ինչ է գրում 1920 թ. ապրիլի 24-ին, էջմիածնի համայնական վարչությունը պառլամենտի նախագահին. «Տարիներով հողագուրկ գյուղացիները պահանջում են հող և հողի հավասարեցում... Եվ արդեն իրենք սկսել են այդ գործը, որ առաջ է բերել ամեն մի գյուղում երկու հոսանք, մեկը՝ որից հող պետք է կտրվի, իսկ մյուսը, որին հող պետք է տրվի: Ամեն օր Վաղարշապատ են թափվում հարյուրավոր գյուղացիներ, որոնք ասում են. «Հողային հարցը մենք զբավարանում ենք որոշել, եկեք տեղն ու տեղը տեսեք, քննեք ու որոշեք, թե չէ մենք ստիպված պետք է լինենք մեր եղանակով, հեղափոխական ճանապարհով լուծել այդ հարցը: Դրությունը լուրջ է, և եթե մենք միջոցներ ձեռք չառնենք, իրենք առանց մեզ կլուծեն այդ և նման շատ հարցեր»¹:

Անտանեւի ծանր դրություն էր ստեղծվել քաղաքներում: Արդյունաբերության քայքայման և ձեռնարկությունների լիկվիդացման հետևանքով՝ անգործությունը մեծ չափերի էր հասել: Իսկ աշխատողների խղճով աշխատավարձը, թղթադրամի արժեքի կատաստրոֆիկ անկումը, առաջին անհրաժեշտ սպառման առարկաների բացակայությունը, չտեսնված թանկությունը և այլն, կատարյալ աղքատության էին մատնել բանվորներին և քաղաքի մյուս աշխատավորներին:

1918—1920 թթ. Հայաստանը աղքատության, վայրենի կամայականության երկիր էր, որբերի ու արցունքի երկիր: Սովն ու համաճարակը մեծ ավերակներ էին գործում: Ժողովրդի լայն մասսաները ապրում էին կատարյալ տեղորի, ահաբեկման և իրավազրկության պայմաններում: Տնտեսական փլուզման հետ զուգընթաց կանգ էր առել կուլտուրայի զարգացումը, քայքայվում էր լուսավորության գործը, փակվում էին դպրոցները, ավելանում էր անդրագիտությունը: Ժողովրդին սպառնում էր ֆիզիկական բնաջնջման վտանգը: Երկիրը գտնվում էր կործանման եզրին:

Միանգամայն ակներև է, որ աշխատավորների համար ստեղծված այս ծանր դրությունը ավելի ու ավելի պետք է սրեր և սրում էր դասակարգային պայքարը ամբողջ երկրում: Տիրող ուժերը, տեղորը և անարխիան ոչ միայն չէին թուլացնում աշխատավորների պայքարը հանուն ժողովրդի և երկրի փրկության, այլև գնալով խորացնում և ուժեղացնում էին այն: 1918—1920 թթ., մինչև մայիսյան ապստամբությունը, Երևանում, Ալեքսանդրապոլում, Սարիղամիշում, Նոր Բայազետում, Լոռու և Զանգեզուրի գավառներում, Շամշադինի և այլ շրջաններում տեղի են ունենում բանվորների, գյուղացիների և զինվորների բազմաթիվ հակադաշնակցական մասսայական ցույցեր, ելույթներ և գործադուլներ:

Աշխատավորների իրավացի պահանջները շատ հաճախ արժանանում էին դաշնակ-մաուդերիստների տեղորին: Դաշնակները փորձում էին Հայաստանի բանվորների, զինվորների և աշխատավոր գյուղացիների հետզհետե խորացող ռևոլյուցիոնացումը կանխել տեղորի, սպանությունների, բանտի և ահաբեկման միջոցով, որոնց աշխատավորները պատասխանում են առավել ակ-

¹ Հայկական ՍՍՌ ՊԿԱ, ֆ. 67/199, գ. 157, էջ 24:

տիվ պայքարով: Այսպես, 1920 թվականի հունվարի սկզբներին Ալեքսանդրոպոլի դեպոյի երկու բանվորների ձերբակալությանը բանվորները պատասխանում են դորժադուով, պահանջելով ազատ արձակել ձերբակալվածներին: Նոր ձերբակալությունները առաջ են բերում քաղաքի ամբողջ աշխատավորների յասումը, որից հետո ոստիկանությունը ստիպված բավարարում է բանվորների պահանջները. ձերբակալվածները ազատվում են:

1920 թ. փետրվար-մարտ ամիսներին տեղի են ունենում Սարիղամիշի զինվորների հակակառավարական ելույթները, Գորիսի կադրային բաժնի ինիցիատիվայի հարյուրակի հուզումները և մի շարք այլ դյուղացիական ելույթներ: Աշխատավորների ելույթները կազմակերպում ու ղեկավարում էին Հայաստանի կոմունիստական կազմակերպությունները, որոնք 1919—1920 թթ. ավելի են ուժեղացնում մասսայական, քաղաքական և կազմակերպական աշխատանքները աշխատավորական լայն մասսաների մեջ: Այդ տարիներին ավելի են ամրապնդվում կոմունիստական կազմակերպությունները: Կազմակերպում են բուլմաթիվ նոր բջիջներ:

Հայաստանի աշխատավորների, զինվորների և երիտասարդության մեջ քաղաքական-մասսայական մեծ աշխատանք էր կատարում Հայաստանի կոմունիստական երիտասարդական կազմակերպությունը՝ «Սպարտակ»-ը: «Սպարտակ»-ը Հայաստանի Կոմպարտիայի մարտունակ, ակտիվ և դորժունյա օղնականն էր, որի աշխատանքները ղեկավարում էին Ղ. Ղուկասյանը, Ա. Խանջյանը, Ա. Բուդաղյանը, Պ. Պետրոսյանը՝ նոր Բայազետ, Գ. Զրադապանյանը՝ Ալեքսանդրոպոլ և ուրիշներ:

1919—1920 թթ. ՌԿ(Բ)Պ Երկրային Կոմիտեն Հայաստան է ուղարկում զգալի թվով ղեկավար աշխատողներ:

1919 թ. սեպտեմբերին կազմվում է Հայաստանի Կոմպարտիայի ղեկավար կենտրոնը՝ ՌԿ(Բ)Պ Հայաստանի Կոմիտեն (Արմենկոմը): Տեղերում պարտիական ղեկավար աշխատանք էին կատարում շատ փորձված և աչքի ընկնող բոլշևիկներ: Դրանց թվում էին՝ Երևանում Ա. Մուսվաթյանը, Սա. Ալլահվերդյանը, Ս. Մարտիկյանը, Ղ. Ղուկասյանը, Հ. Զարգարյանը, Ա. Խանջյանը և ուրիշներ: Ալեքսանդրոպոլում պարտիական աշխատանքը ղեկավարում էին Բ. Ղարիբջանյանը, Ե. Սևյանը, Ս. Գրիգորյանը, նոր Բայազետում՝ Հ. Սարուխանյանը, Բ. Բատիկյանը, Դիլիջանի գավառում՝ Շ. Ամիրխանյանը, Ե. Մկրտումյանը, Ա. Բերբերյանը, Ե. Շեմախյանը, Զանգեզուրում՝ Հ. Բեջանյանը (Կամարի), Բ. Հարությունյանը, Խ. Մկրտչյանը, Կարսում՝ Ա. Նազարյանը, Ա. Ռովմասյանը, Վ. Ղադանջյանը, Սարիղամիշում՝ Ս. Զուգուրյանը, Կ. Գարադաշը, Պ. Կոռխմալյակիներ և շատ ուրիշներ, որոնց թիվը Հայաստանում հետզհետե ավելանում էր:

Կոմունիստական կազմակերպությունների կազմակերպական, քանակական և իդեական ամրացումը, աշխատավորների մեջ նրանց աշխատանքի ուժեղացումը և նրանց հեղինակության աննախընթաց բարձրացումը խիստ անհանգստացնում է դաշնականներին ու նրանց տերերին: Օտարերկրյա գաղութարարները չէին կարող հանդուրժել, որ իրենց դորժակալները՝ դաշնականները անուժ են՝ կասեցնելու կոմունիստական ազդեցության ուժեղացումը աշխատավորների մեջ: Ուստի նրանք թելադրում են դաշնակցական կառավարությունը՝ դիմել կտրուկ միջոցների, անխնա դատապատան տեսնել կոմունիստների և ռևոլյուցիոն բանվորների ու դյուղացիների հետ:

1919 թ. մարտի 23-ին, Անդրկովկասի բրիտանական հրամանատարությունը, դաշնականների կառավարությանը ուղղված դրուժյամբ՝ հիշեցնելով Ալեքսանդրոպոլում գոյություն ունեցող բոլշևիկյան Կոմիտեի և նրա աշխատանքի մասին, անհրաժեշտ էր համարում՝ «անմիջական քայլերի դիմել», վերացնել Ալեքսանդրոպոլի Կոմիտեն և նրա ղեկավարներին խիստ պատժել:

Ձերբակալությունները, հալածանքն ու տեղորոշ, սակայն, չէին կարող արգելակել աշխատավորներին համախմբմանը կոմունիստական կազմակերպությունների շուրջը, նրանց դրոշի տակ: Աշխատավորները համոզվել էին, որ հայ բուրժուազիան, նրա կամակատար պարտիաները և անգլո-ամերիկյան գաղութարարները երկիրը տանում են դեպի լիակատար կործանում: Փակուղուց, որի մեջ գտնվում էր Հայաստանը, կարող էր դուրս գալ միայն դաշնականների տիրապետության տապալման, ինտերվենտներին երկրից վճռական և հայ ժողովրդի բախտը Սովետական Ռուսաստանի հետ կապելու, երկրում սովետական կարգեր հաստատելու միջոցով:

Հայաստանի Կոմունիստական կազմակերպությունների առաջին կոնֆերանսը (հունվար, 1920 թ.) Հայաստանի բոլշևիկների առաջ դրեց անհետաձգելի խնդիր՝ ապստամբության միջոցով տապալել դաշնականների հակաժողովրդական տիրապետությունը և Հայաստանում հաստատել Սովետական իշխանություն:

Խոսելով այդ մասին մի հողվածում Ա. Մյասնիկյանը մեջ է բերում Հայաստանի կոմունիստական կազմակերպությունների առաջին կոնֆերանսի բանաձևից մի հատված, որտեղ ասված է. «Միայն այդ ճանապարհով մենք կկարողանանք Սովետական իշխանության ամուր հիմք դնել, միայն այդ ճանապարհով հնարավոր է փրկել մասսաներին կործանումից...»:

1920 թ. հունվար-ապրիլ ամիսները հանդիսանում են քաղաքական աշխատանքի ծավալման, բանվորներին, զինվորներին ու աշխատավոր գյուղացիներին մորիլիզացնելու, պարտիական կազմակերպությունները մարտական դրուժյան մեջ դնելու ամիսներ:

Ռուսաստանի քաղաքացիական պատերազմի ռազմաճակատներում, 1919 թ. վերջերին և 1920 թ. սկզբներին Կարմիր Բանակի տարած պատմական հաղթանակները նոր թափ են հաղորդում դաշնականների դեմ մղվող պայքարին:

Թշնամուց ազատագրելով Ուկրաինան և Հյուսիսային Կովկասը, 1920 թվականի դարնանը, Սովետական Ջինված Ուժերը ընդհուպ մոտենում են Անդրկովկասին: Դենիկինի և ինտերվենտների դեմ Կարմիր Բանակի տարած պատմական հաղթանակներով ոգեշնչված՝ Անդրկովկասի և Հայաստանի աշխատավորները, կոմունիստական կազմակերպությունների ղեկավարությամբ, ուժեղացնում են իրենց պայքարը «ազգային կառավարությունների» և բուրժուա-նացիոնալիստական պարտիաների դեմ: Դաշնականների, մենշևիկների և մուսավաթիստների մարիոնետային կառավարությունների տապալման խնդիրը դառնում է մոտալուտ հարց:

1920 թվականի մարտին ՌԿ(Բ)Պ Կովկասյան Երկրային Կոմիտեն դիմում է Սովետական իշխանությանը և խնդրում՝ օգնել Անդրկովկասի աշխատավորներին՝ ազատագրվելու «ազգային կառավարությունների» և ինտերվենտների ծանր լծից: «Ձեր հաղթանակը, -- ասված է դիմումի մեջ, -- թանկագին եղբայր-

ներ և ընկերներ, քաղաքացիական կռվի ճակատներում, ձեր անօրինակ հերոսության սխրագործությունները պատերազմի դաշտերում և աշխատանքի ճակատում, մեր սրտերը լցնում են արիությանը և համոզմունքով նաև մեր հաղթանակի նկատմամբ...:

Մենք խիստ տենչում ենք ուս պրոլետարիատի հետ ձեռք-ձեռքի տված՝ մտնել ընդհանուր աշխատանքի և սոցիալիստական շինարարության նոր կյանքի մեջ...»¹:

Այս դիմումը արտահայտում էր Անդրկովկասի, այդ թվում և Հայաստանի աշխատավորների տենչերն ու ձգտումները, որոնք պայքարում էին իրենց ազատության համար:

Սովետական կարգերի հաստատման առաջին ազդանշանը տալիս է Բաքվի պրոլետարիատը, որը Կարմիր Բանակի զորամասերի օգնությամբ 1920 թվականի ապրիլի 28-ին տապալում է մուսավաթիստների և օտարերկրյա դաշնությանների լուծը և երկրում հաստատում Սովետական իշխանություն:

Ադրբեջանում սովետական կարգերի հաստատման և Կարմիր Բանակի Անդրկովկաս մտնելու լուրը արագորեն տարածվում է Հայաստանում և չերմխանդավառություն առաջացնում աշխատավորական լայն խավերի մեջ: Դա ցայտուն կերպով դրսևորվում է մալիսմեկյան ցույցերի ժամանակ և նրանից հետո:

III

Մայիսի 1-ը կազմակերպված նշելու և աշխատավորների ուսուցիչները մոբիլիզացնելու համար պարտիական կազմակերպությունները ապրիլի կեսերից նախապատրաստական լայն աշխատանք են ծավալում: Տոնակատարությունը մասսայական ու կազմակերպված է ընթանում Երևանում, Ալեքսանդրոպոլում, Ղարաբաղիսայում, Սարիղամիշում, Կարսում և մի շարք այլ վայրերում:

Երևանի աշխատավորների ցույցը ղխավորում էր աննկուն բոլշևիկ, Հայաստանի կոմունիստական կազմակերպության մարտական ղեկավար Ստ. Ալլահվերդյանը: Ցուցարարների կազմակերպվածությունը, նրանց խանդավառ տրամադրությունը, շփոթություն են առաջացնում դաշնակ բախտախնդիրների և նրանց համախոհների լազերում:

Ցույցերը նույն ընթացքն են ունենում նաև մյուս վայրերում և ընդունում բացարձակ հակադաշնակցական, մարտական բնույթ:

Երևանում, Ղարաբաղիսայում և այլ վայրերում դաշնակների կողմից, պրովոկացիոն նպատակով տարածված հայտարարությունները, ուղղված Կարմիր Բանակի և Սովետական Ադրբեջանի դեմ, խիստ հակահարված են ստանում ցուցարարների կողմից: Դաշնակների պարտությունը ակնբախ էր:

Ցուցարարները ուղջունի ջերմ հեռադրեր են ուղարկում հաղթանակած Բաքվի պրոլետարիատին, Կարմիր Բանակին և Ադրբեջանի աշխատավոր դյուղացիներին: Ալեքսանդրոպոլի միտինգի կողմից ընդունած հեռագրում ասվում էր, որ Հայաստանի բանվորները, դյուղացիները և զինվորներն իրենց եղբայրական ձեռքն են մեկնում Բաքվի ուսուցիչներ բանվորներին և զինվորներին, և խոստանում են հետևել նրանց օրինակին, տապալել դաշնակների բռնակա-

¹ ԻՄԷԼՍ-ի Վրացական ֆիլիալ, 1917—1920 թթ. բոլշևիկյան պրոկլամացիաների քոնդ:

յական կառավարությունը և հաստատել Սովետական իշխանություն¹։ Նույն-պիսի բովանդակություն ունեցող հեռագրեր են ուղարկվում Հայաստանի մյուս վայրերից։

Ադրբեջանի Ռազմա-ռևոլյուցիոն Կոմիտեն ուղարկած հեռագրում Արմենկոմը ամբողջ աշխատավորների և Հայաստանի կոմունիստական կազմակերպությունների անունից գրում էր. «Միջազգային պրոլետարիատի տոնին՝ մայիսի 1-ին, ՌԿ(Բ)Պ Հայաստանի Կոմիտեն, Հայաստանի բոլոր կենտրոններից, շտեմնված, դրանդիող միտինգների տեղեկություններ է ստացել։ Հայաստանի պրոլետարիատը, գյուղացիությունը և զինվորները, համախմբվելով իրրորդ Կոմունիստական Ինտերնացիոնալի դրոշի տակ, ողջունում են Ադրբեջանի հերոսական պրոլետարիատին, գյուղացիներին և կարմիր զինվորներին, ռևոլյուցիոն դասակարգային ճակատում տարած նրանց հաղթանակի համար, մուսավաթական դավաճան կառավարությունը տապալելու համար։

Հայաստանի պրոլետարիատը, գյուղացիությունը և ռևոլյուցիոն զինվորները, թևավորված այդ հաղթանակով... հավատում են իրենց հաղթանակի մոտիկությանը ընդդեմ... դաշնակների դավաճան կառավարության»²։

Մայիսմեկյան ցույցերը ավելի մարտական մթնոլորտում անցան Ալեքսանդրոպոլում։ Յուլցի մասնակից մի քանի հազար բանվորների, արհեստավորների, ծառայողների և զինվորների միջև դրսևորվում է սերտ բարեկամություն և միասնություն։ Զինվորների պահանջով ցուցարարները այցելում են զորանոցները, որտեղ նույնպես տեղի է ունենում միտինգ։ Միտինգի մասնակիցները «Վարդան Զորավար» զրահագնացքի հրամանատար կապիտան Մուսայելյանի մարտական ճառը ընդունում են խանդավառությամբ։ Մուսայելյանը մերկացնում է դաշնակների մարիոնետային կառավարության հանցագործ, դավաճանական քաղաքականությունը հայ ժողովրդի նկատմամբ և կոչ է անում համախմբվել Կոմունիստական պարտիայի դրոշի տակ, պայքարել Հայաստանում սովետական կարգերի հաստատման համար։

Դաշնակները Ալեքսանդրոպոլում, ինչպես նաև Կարսում, Սարիղամիշում և Քավթառլուում (այժմ Փանիկ) նույնիսկ ելույթ ունենալու փորձ չեն անում։

Հիշատակության արժանի է այն փաստը, որ Սարիղամիշում, Ղարաքիլիսայում և մի շարք այլ վայրերում կայազորների զինվորները հակառակ իրենց հրամանատարների կամքին՝ համախմբվել էին կոմունիստների շուրջը։

Մայիսմեկյան ցույցերը հաստատեցին, որ աշխատավորական լայն խավերը ատելությամբ են լցված դաշնակ ավանդյուրիստների նկույթի տիրապետության դեմ, գիտակցելով, որ անդլո-ամերիկյան իմպերիալիստներին ծառայագրված այդ նողկալի լրտեսները հայ ժողովրդին կանգնեցրել են կործանման եզրին, որից դուրս գալու միակ ելքը սովետական կարգերի հաղթանակի մեջ է։

Մայիսմեկյան ցույցերը միաժամանակ տապալեցին, որ Հայաստանի ժողովրդական լայն խավերը գնում են բոլշևիկների ետևից, Կոմունիստական պարտիայի և Սովետական իշխանության գաղափարները լայն մասսայականություն են վայելում ժողովրդի մեջ։

Կոնտրռևոլյուցիոն պարտիսանների՝ դաշնակների, մենշևիկների, էսեռների

¹ Տե՛ս ԻՄԷԼՍ-ի Հայկական ֆիլիալի արխիվ, ֆ. 33, դ. 849, թ. 1,

² Նույն աղբյուր։

և այլոց բոլոր ջանքերը՝ մասսաներին շեղել նրանց դասակարգային պայքարից, դուրս բերել կոմունիստների ազդեցությունից՝ ապարդյուն անցան:

Վերջապես, մայիսյան ցույցերի ժամանակ դրսևորվեց աշխատավորների պատրաստակամությունը կոմունիստների ղեկավարությամբ, ղենքը ձեռքին պայքարել դաշնակների տիրապետության տապալման և Հայաստանում Սովետական իշխանության հաստատման համար:

Ակներև էր, որ երկրում գոյություն ունեցող քաղաքական լարված իրադրության պայմաններում արագորեն հասունանում էր ռևոլյուցիոն սիտուացիան:

Ամբողջ երկրում ստեղծվել էր քաղաքական լարված իրադրություն: Ապրտամբական տրամադրությունը համակել էր ոչ միայն կոմունիստներին, այլ բանվորներին, զինվորներին և գյուղացիական լայն մասսաներին: Դաշնակները անուժ էին այն արգելակելու: Մայիսյան ցույցերի, աշխատավորների հակադաշնակցական տրամադրությունների մասին գավառներից ստացվող տեղեկությունները, ինչպես խոստովանում էին անդամ դաշնակները, շփոթություն էին առաջացրել Հայաստանի «կառավարողների» շրջանում: Նրանք զգում էին, որ բռնկող կրակը դժվար է մատել:

Այսպիսով, 1920 թ. մայիսյան ցույցերը Հայաստանում հանդիսացան զինված ապստամբության նախնորդանք: Մայիսի մեկից հետո մասսայական ապստամբություններ բռնկվեցին Ալեքսանդրոպոլում, Կարսում, Սարիղամիշում, Նոր Բայազետի գավառում, Նամշաղինի, Իջևանի և մյուս շրջաններում:

Դրությունը հատկապես սրվում էր Ալեքսանդրոպոլում: Դաշնակների մտադրությունը՝ մայիսի լույս 2-ի գիշերը անցկացնել կոմունիստների մասսայական ձերբակալություն, անհաջողություն է մատնվում:

Կոմունիստները կենտրոնանում են կայարանում: Կայարանը և «Վարդան Զորավար» զրահադնացքը դառնում են ապստամբության կենտրոնը: Մայիսի 5-ից սկսած դաշնակները այլևս չեն կարողանում երևալ կայարանում:

Բ. Ղարիբջանյանի, Է. Սևյանի, Ս. Գրիգորյանի և մյուսների գլխավորությամբ կազմակերպվում և դասավորվում էր ապստամբության համար անհրաժեշտ ուժը, ուժեղացվում է մասսայական աշխատանքը զինվորների մեջ: Մայիսի 7-ին Ալեքսանդրոպոլում կազմվում է Հայաստանի Ռադմ.ռև. կոմիտեն, որի կազմի մեջ մտնում էին Ս. Մուսայելյանը, Ա. Մելքոնյանը, Պ. Պետրոսյանը (զինվոր) և ուրիշներ:

Հաջորդ օրերին ծավալված պայքարը փոխվում է ապստամբության: Մայիսի 10-ին ապստամբները մտնում են քաղաք կոտորելով դաշնակների դիմադրությունը¹:

Հայաստանի Ռեկոմի ցուցումով, նույն օրը ապստամբվում են Կարսի բանվորները և կայադորի զինվորները: Ապստամբություն է տեղի ունենում նաև Քավթաուլում, իսկ մայիսի 11-ին՝ Սարիղամիշում: Այսպիսով, մայիսի 10-ին և 11-ին Հայաստանի արևմտյան գլխավոր քաղաքներում և օայտներում տապալվում է դաշնակների ատելի տիրապետությունը և հաստատվում Սովետական իշխանություն:

¹ Ալեքսանդրոպոլի ապստամբության մասին տե՛ս մեր «Ալեքսանդրոպոլի 1920 թ. մայիսյան զինված ապստամբության պատմությունից» հոդվածը, «Տեղեկագիր», 1948, № 6, իսկ Կարսի ապստամբության մասին՝ «Մի էջ մայիսյան ապստամբության պատմությունից» հոդվածը, «Տեղեկագիր», 1952, № 5:

Հաղթական ապստամբության լուրը շուտով հասնում է Հայաստանի մյուս շրջանների և գավառների աշխատավորներին, որոնք նույնպես ոտքի են եկնում ընդդեմ դաշնականների:

Մայիսյան ապստամբության ակտիվ մասնակից, Ալեքսանդրոպոլի 1-ին հեծյալ զնդի միավորներից մեկի հրամանատար Խ. Խ. Բաղրամյանը, խոսելով ապստամբությանը՝ զնդի ունեցած մասնակցության մասին, գրում է. «Գունդը մայիսմեկյան ցույցի օրը վճռապես անցավ երկաթուղային ցուցարար բանվորների կողմը: Կայազորի այլ մասերին գնդի կողմից ուղղված ռևոլյուցիոն կոչը ռևոլյուցիայի կողմը քաշեց կայազորի համարյա բոլոր զորամասերին»: Գունդը մյուս զորամասերի հետ միասին ակտիվ կերպով մասնակցեց ապստամբությանը և հանդիսացավ Ռեկոմի հենարաններից մեկը Ալեքսանդրոպոլում¹:

Հայաստանի աշխատավորների հետ միասին դաշնականների տիրապետության տասլարվաճ համար ապստամբեցին բանակի զորամասերը:

Ալեքսանդրոպոլի, Կարսի և Սարիղամիշի ապստամբների հաղթանակը ոգեշնչում է ամբողջ հայ ժողովրդի զանգվածներին, որոնք նույնպես ապստամբության դրոշ են պարզում նոր Բայազետի, Դիլիջանի, Զանգեզուրի գավառներում:

Նոր Բայազետի գավառում ապստամբության կազմակերպումը և գլխավորումը Արմենկոմը հանձնարարում է բոլշևիկ Հ. Սարուխանյանին: Մայիսի 9-ին, Արմենկոմի հատուկ հանձնարարություններով Հ. Սարուխանյանը Երևանից մեկնում է նոր Բայազետ: Ապստամբությունը Սարուխանյանն սկսում է Ղարանյուղից (Մարտունի), որտեղ կանչվել էր գեներալ Սիլիկովի կողմից: Սիլիկովի նստատեղն էր կամ ստիպել Սարուխանյանին՝ հրաժարվել իր գաղափարներից, կամ ձերբակալել նրան, կանխել ապստամբությունը, սակայն ցարական և դաշնակցական այդ սատրապի բոլոր փորձերն անհաջողության էն մատնվում: Մայիսի 13-ին Սարուխանյանը իրականացնում է ապստամբությունը Ղարանյուղում: Տասլարվում է դաշնականների իշխանությունը: Նույն օրը կազմվում է ռեկոմ, որի կազմի մեջ են մտնում Հ. Սարուխանյանը (նախագահ), Ս. Մակարյանը, Մ. Պետրոսյանը, Լ. Ներսիսյանը, Հ. Խաչատրյանը և ուրիշ զինվորներ: Ռեկոմի որոշմամբ կազմակերպվում են գյուղական Սովետներ՝ շրջանի կենտրոնում և յոթ գյուղերում: Գյուղում Սովետական իշխանության օրգանների կազմակերպման ուղղությամբ աչքի ընկնող գործ են կատարում պարտիայի անդամներ Ս. Բուղումյանը, Խ. Փոշոտյանը, Հ. Շուքուրյանը և ուրիշներ: Իշխանությունը իր ձեռքը վերցնելով և թիկունքն ամրացնելով, ռեկոմը որոշում է հարձակվել գավառի կենտրոնի՝ նոր Բայազետի վրա:

Նոր Բայազետի կոմունիստական կազմակերպության կատարած քաղաքական-մասսայական աշխատանքի շնորհիվ՝ աշխատավորները ամբողջովին կանգնում են Սովետական իշխանության պաշտպանության դիրքերում: Դաշնականները կորցրել էին իրենց ոտքի տակի հողը, Որպեսզի կանխեն ապստամբությունը՝ քաղաքում, նրանք մայիսի 14-ին ձերբակալում են 13 կոմունիստների և արսափսում Սևան կղզին, սակայն այդ էլ նրանց չի օգնում:

Նոր Բայազետ ուղարկված դաշնակցական պառլամենտի անդամները խոստովանում էին, որ «ոչ միայն Ղարանյուղ արշավելու (ապստամբների

¹ «Նորհրդային Հայաստան», № 103, 1927:

դեմ — Հ. Կ.), այլ անգամ քաղաքը տեղական ուժերով պաշտպանելու հնարավորություն չկար... Միլիցիան անվստահելի էր»¹:

Ժողովրդի լայն խավերի մեջ ոչ մի աջակցություն չգտնելով, որոշ դիմադրությունից հետո գավառային կոմիսարը իր երկու-երեք տասնյակ համախոհներով ապստամբների ճնշման տակ՝ փախուստի է դիմում, ապստամբները գրավում են քաղաքը:

Մայիսի 14-ին ապստամբում է Շամշադինի շրջանը, իսկ 19-ին Իջևանի շրջանը: Շամշադինի ապստամբ գյուղացիները, կոմունիստների ղեկավարությամբ, գավառային կոմիտեի ներկայացուցիչ Ա. Բերբերյանի գլխավորությամբ, մայիսի 15-ին իշխանությունը իրենց ձեռքն են վերցնում: Իջևանի շրջանի ապստամբները՝ Շ. Ամիրխանյանի, Ե. Մկրտումյանի և կոմունիստ սպա Ս. Հակոբջանյանի ղեկավարությամբ մայիսի 20-ին Սև-քար գյուղից սկսում են հարձակումը և գրավում շրջանի կենտրոնը՝ Քարվանսարան (Իջևանը), իսկ 21-ին՝ Դիլիջանը: Դիլիջանում կազմակերպվում է գավառային ուկոմ Շ. Ամիրխանյանի և Ե. Մկրտումյանի գլխավորությամբ:

Դաշնակցական կառավարությունը օգնություն է խնդրում ամերիկա-անգլիական իմպերիալիստներից: Մայիսի 22-ին, նա Վրաստանի իր դիվանայիտական ներկայացուցչին ուղարկած հեռագրում հայտնում է. «Բոլշևիկները գրավեցին Դիլիջանը: Կատեգորիկ կերպով դաշնակիցներից օգնություն խնդրեցեք...»²:

Սիսիանի շրջանի աշխատավորները ապստամբում են մայիսի 20-ին և շրջանում հաստատում են Սովետական իշխանություն, իսկ Գորիսի շրջանի աշխատավորները՝ մայիսի 28-ին:

Ապստամբության փորձ են կատարում նաև Ղարաքիլիսայի, Դարալագյազի, Սուրմալուի, Կաղզվանի աշխատավորները և ղինվորները: Ապստամբական զորություն էր տիրում կանոնավոր բանակի 2-րդ զնդում և «Ազատամարտ» զրահագնացքի անձնակազմի շրջանում:

Այսպիսով, Հայաստանի բանվորները, գյուղացիները և ղինվորները, անսահման ատելությամբ լցված դաշնակների տիրապետության նկատմամբ, մասսայական ապստամբությամբ ցանկանում են տապալել դաշնակների անարգ կառավարությունը և երկրում հաստատել սովետական կարգեր:

Ինչպես տեսանք, մայիսյան ղինված ապստամբությունը մի պատահական ապստամբություն չէր, այլ աշխատավորների հերոսական մասսայական ապստամբությունն էր հանուն իրենց ազատության: Ապստամբության հաղթանակի համար բոլոր անհրաժեշտ սոցիալ-դասակարգային և քաղաքական գործոնները առկա էին: Բայց Արմենկոմը և Ռազմուկեկոմը նախօրոք չսլանավորեցին ապստամբությունը, այն միասնական դարձնելու համար: Ապստամբությունները տեղի ունեցան տարբեր ժամկետներում, մեկը մյուսից անջատ: Հաղթանակից հետո ապստամբները մի շարք վայրերում սկզբից ևեթ հարձակման շանցան, այլ կառչեցին պաշտպանողական տակտիկայից, որը մահ էր ապստամբության համար:

Ձինված ապստամբությունը որպես քաղաքական պայքարի մի առանձին տեսակի Կ. Մարքսը անվանել է արվեստ: Վ. Ի. Լենինը՝ շարադրելով այդ

¹ Հայկական ՍՍՌ ՊԿՍ, ֆ. 65/100, դ. 147, թ. 7:

² Հ. Լյիլիեկյան, Սովետական իշխանության հաղթանակը Հայաստանում, Հայկական ՍՍՌ Դիմ. աղագ. «Տեղեկագիր», № 2, 1950:

«արվեստի» գլխավոր կանոնները, ցույց է տվել, որ ապստամբության հետ խաղ չպետք է անել, այն սկսելու դեպքում պետք է մինչև վերջը գնալ: Վճռողական տեղում—վճռողական մոմենտին թշնամու նկատմամբ անհրաժեշտ է ստեղծել ուժերի մեծ գերակշռություն և առանց դանդաղելու անպայման հարձակման անցնել. պաշտպանությունը դինված ապստամբության մահն է: Հակառակորդին պետք է հանկարծակիի բերել, անհրաժեշտ մոմենտին հարվածել նրան, քանի դեռ նրա ուժերը ցրված են, չթողնել, որ նա հավաքի իր ուժերը: Անհրաժեշտ է ամեն օր, ինչ գնով էլ ուզում է լինի, հաջողությունների հասնել, պահպանել ապստամբների բարոյական գերակշռությունը, ընդ որում անպայման ցուցարները համարձակություն, դարձյալ համարձակություն գործողությունների մեջ¹: Ապստամբության հաղթանակի ապահովման համար անհրաժեշտ մարքս-լենինյան այս կարևորագույն դրույթները մայիսյան ապստամբության ժամանակ մոռացության տրվեցին:

Ունենալով հանդերձ քանակապես գերակշիռ, ապստամբության հաղթանակից ռզեշնչված զինված ուժ, ռեկոմը հապաղեց, հարձակման շանցալ՝ թշնամին ժամանակ շահեց, հարձակման նախաձեռնությունը իր ձեռքը վերցրեց:

Ապստամբության թիկունքը չմաքրվեց թշնամական տարրերից, որոնք բողարկվելով դարան մտան և սկսեցին քայքայիչ աշխատանք կատարել:

Օգտագործելով իր համար նպաստավոր իրադրությունը, թշնամին մայիսի 13-ին մոտեցավ Ալեքսանդրոպոլին. 14-ի լույս գիշերը դաշնակա-մաուզերիստական տարրերը, առանձին խմբերով սկսեցին թափանցել քաղաքը և լուսաբացին դրսից եկած ուժերի ընդհուպ մոտենալը որոշեց քաղաքի անկման անխուսափելիությունը, ապստամբության պարտությունը: Մի օր Ալեքսանդրոպոլի անկումից առաջ՝ մայիսի 13-ի գիշերը Կարսի Ռեկոմը և ակտիվը նահանջեց քաղաքից:

Ալեքսանդրոպոլի անկումից հետո կոնտրռեվոլյուցիան իր ուժերը կենտրոնացրեց Սարիզամիշի դեմ, որտեղ ապստամբությունը ճնշվեց մայիսի 17-ին:

Ծնշելով ապստամբությունը Ալեքսանդրոպոլում և մի քանի այլ վայրերում, դաշնակները ուժեր են ուղարկում Նոր Բայազետի ապստամբների դեմ: Ապստամբների հերոսական² դիմադրությունը քաղաքից 8—10 կիլոմետր հեռավորության վրա՝ չի փոխում դրությունը: Մայիսի 19-ին ընկնում է նաև Նոր Բայազետը:

Ապստամբական գործողությունները ավելի կազմակերպված բնույթ են կրում Դիլիջանի գավառում, մասնավորապես Շամշադինի շրջանում: Այստեղ դաշնակներին չի հաջողվում հեշտությամբ ընկճել գյուղացիների դիմադրությունը: Շամշադինի ապստամբությունը ղեկավարելու գործում մեծ դեր կատարեց գավառային կոմիտեի ներկայացուցիչ Ա. Բերբերյանը, որը ամբողջովին իրեն նվիրում է ապստամբության հաղթանակը ապահովելու գործին և մի շարք ընկերների հետ միասին գլխավորում է ռադմական գործողությունները:

Մայիսի 18-ից սկսած շրջանը բաժանված էր երկու մասի. երկու լագերի: Ամրանալով Ղրղի և Վերին Կարմիրաղբյուր գյուղերի բարձունքներում, ապրստամբները հերոսաբար կռվում էին դաշնակների կանոնավոր զորային միավորների դեմ, ծանր հարվածներ հասցնելով նրանց: Շամշադինի շրջանում

¹ Տճս Վ. Ի. Լեցից, Երկեր, հատ. 36, էջ 211:

սկսվում են քաղաքացիական կռիվներ, որոնք ավելի կատաղի բնույթ են ուտանում հունիսի 11-ից սկսած, երբ թշնամին լրացուցիչ ուժեր ուղարկում և նույնում է հարձակման, բայց միշտ հանդիպում է ապստամբների հակահարվածին:

Հունիսի 18-ին դաշնակցական զորքի հրամանատարությունը հայտնում է կառավարությանը, որ «Այսօր առավոտյան ժամը 11 և կեսին Շամշադինի բոլշևիկյան տասը գյուղերը կազմակերպված հարձակվեցին Տոուզ Կալա գյուղի վրա. ամբողջ հինգ ժամ հրադանաձգությունը շարունակվում է մեզ վրա՝ վերին Կարմիրաղբյուր և Թոուզ գյուղերի դիրքերից»¹:

Դաշնակները ավելի ուժեղ հարվածներ են ստանում հունիսի 19—21-ին տեղի ունեցած մարտերում և 22-ին թշնամու կանոնավոր զորամասը փախուստի է դիմում:

Դիլիջանի գավառից Աղբբեջան նահանջած ապստամբ ուժերը նոր հարձակման են անցնում հունիսի 22-ին, ջախջախում են հակառակորդին և 23-ին նորից գրավում Իջևանը, նպատակ ունենալով կրկին վերականգնել Սովետական իշխանությունը ամբողջ գավառում: Սակայն ապստամբների Իջևանի խմբի հրամանատարության թույլ տված կոպիտ սխալների և անկազմակերպվածության պատճառով, նրանք նորից նահանջում են Սովետական Աղբբեջան:

Շամշադինի ապստամբ գյուղացիները շարունակում են պայքարը մինչև հունիսի 27-ը, նահանջում են Աղբբեջան միայն հատուկ կարգադրություն ստանալուց հետո:

Մայիսյան փառասլանծ ապստամբությունը թանկ զոհեր պահանջեց: Հայ ժողովրդի ազատության համար, սովետական կարգերի համար մղվող պայքարում իրենց կյանքը տվին մեր ժողովրդի շատ խիզախ զավակներ, Կոմունիստական պարտիայի անձնուղաց ղեկավորներ, Հայաստանի պարտիական կազմակերպությունների մի քանի տասնյակ ղեկավարներ ու դործիչներ: Մեր ժողովուրդը միշտ վառ կպահի իր հիշողությունում Ստ. Ալլահվեդյանի, Հ. Սարգսյանի, Բ. Ղարիբջանյանի, Ղ. Ղուկասյանի, Բ. Բառիկյանի, Ե. Սևյանի, Ս. Մուսայելյանի, Խ. Մկրտումյանի, Բ. Հարությունյանի, Ա. Ծուղուրյանի, Ա. Փանյանի և շատ ուրիշների հիշատակը:

Մայիսյան ապստամբությունից հետո Հայաստանի բանվորների և աշխատավոր գյուղացիների պայքարը դաշնակների արյունոտ տիրապետության դեմ՝ շղաղարեց, այն հաղթանակով պսակվեց 1920 թ. նոյեմբերին: Ռուս մեծ ժողովրդի օգնությամբ, Կոմունիստական պարտիայի ղեկավարությամբ, Հայաստանի աշխատավորները վերջնականապես ազատագրեցին երկիրը և Հայաստանում հաստատեցին Սովետական իշխանություն, որը բերեց մեր ժողովրդին ազատ բարգավաճման և ազդային վերածննդի լայն հնարավորություն: Սովետական իշխանության շնորհիվ, որի համար 35 տարի առաջ աշխատավորները կատարեցին մայիսյան հերոսական ապստամբությունը, հայ ժողովուրդը այդ ժամանակամիջոցում ձեռք է բերել պատմական մեծագույն նվաճումներ տնտեսության, կուլտուրայի, արվեստի, դիտության և մյուս բնագավառներում: Սովետական Մեծ Միության եղբայրական ընտանիքում նա ակտիվորեն մասնակցում է Կոմունիստական շինարարության վեհ դործին և մանրահամար վստահությամբ լի՝ իր փառավոր ապագայի նկատմամբ, քայլում է դեպի առաջ, դեպի Կոմունիզմի վերջնական հաղթանակը:

¹ Հայկական ՍՍՌ ՊԿԱ, ֆ. 67/199, դ. 1733, թ. 107: